



Odluka Vijeća ministara onemogućava rad BiH institucija za vladavinu zakona

Vršilac dužnosti visokog predstavnika Raffi Gregorian izrazio je zabrinutost prošlosedmičnom odlukom Vijeća ministara da ne produži mandate međunarodnih sudija i tužilaca koji rade na predmetima terorizma, organiziranog kriminala i korupcije u Sudu BiH i Tužilaštvu BiH.

“Ova odluka pokazuje da je Vijeće ministara BiH podleglo političkom pritisku koji vodi ograničenju efikasnosti pravosudnog sistema Bosne i Hercegovine,” izjavio je Gregorian. “Objašnjenje kako su troškovi prevođenja za ljude koji rade na predmetima terorizma, organiziranog kriminala i korupcije previsoki je smišljena varka. S obzirom da se takvi troškovi izmiruju iz međunarodnih donacija, javnost zna koji su stvarni razlozi ove odluke,” naglasio je v.d. visokog predstavnika.

Transparency International objavio je prošle sedmice da korupcija predstavlja veći problem u BiH nego u bilo kojoj drugoj zemlji u regionu. BiH mora barem sustići druge zemlje regiona i usvojiti mjere za borbu protiv korupcije kako bi bilo razmotreno pitanje liberalizacije viznog režima. “U tom kontekstu, odgovor Vijeća ministara danas je potpuno nelogičan”, rekao je Gregorian.

Predsjednica Suda BiH Meddžida Kreso, glavni tužilac BiH Milorad Barašin i predsjednik VSTV-a Milorad Novković pokrenuli su 2007. godine zajednički apel za produženje mandata međunarodnih zvaničnika na Sudu i Tužilaštvu BiH nakon 2009. godine. Ministarstvo pravde je ovoga ljeta nerado pripremio ove djelomične izmjene i dopune, tek nakon ponovljenih apela lokalnih zvaničnika, visokog predstavnika i brojnih drugih međunarodnih aktera.

Prijedlogom Vijeća ministara, uloga međunarodnih zvaničnika koji pomažu u istragama, krivičnom gonjenju i suđenjima u predmetima terorizma, organiziranog kriminala i korupcije prestaje krajem ove godine. Posljedice ovakve odluke će ozbiljno unazaditi nastojanja da se izgradi vladavina zakona u BiH. Doći će do neizbježnog gomilanja predmeta koji čekaju procesuiranje, s obzirom da Vijeće ministara prošle godine nije osiguralo neophodna sredstva za obučavanje, provjeru i zapošljavanje domaćeg osoblja koje bi zamijenilo sve međunarodne zvaničnike koji odlaze, a koje plaćaju međunarodni donatori. Ovo bi zauzvrat moglo ugroziti prava pojedinaca, poput onih koja se odnose na pravovremeni postupak i brzo suđenje.

Visoki predstavnik EU Javier Solana pisao je predsjedavajućem Vijeća ministara BiH Nikoli Špiriću dan prije sjednice VM-a, kako bi naglasio da EU i međunarodna zajednica u cijelosti očekuju od državnih institucija da podrže stavove pravosudnih institucija BiH.

Na sastanku održanom u junu, Upravni odbor Vijeća za implementaciju mira pozvao je Vijeće ministara da usvoji izmjene i dopune Zakona o Sudu BiH i Zakona o Tužilaštvu BiH o produženju mandata međunarodnih sudija i tužilaca uzimajući u obzir stavove lokalnih pravosudnih institucija i prihvati preporuke predsjednika Haškog tribunala.

“Parlamentarci BiH sada imaju odgovornost da podrže pravosudni sistem BiH i zaštite ga od političkih ograničenja u njegovom djelovanju”, izjavio je v.d. visokog predstavnika Gregorian. “Odlazak međunarodnih sudija i tužilaca će oslabiti sposobnost BiH da odgovori na organizirani kriminal i terorizam upravo u pogrešnom trenutku; članovi Parlamenta mogu proširiti ove izmjene i dopune kako bi produžili mandat međunarodnih sudija i tužilaca koji rade na predmetima organiziranog kriminala i terorizma na Sudu BiH i Tužilaštvu BiH, te na taj način pokazati svoju opredijeljenost pravosudnim institucijama BiH i vladavini zakona.”